

現代生活藝術系列

華嚴經疏論纂要 81

— 佛不思議法品之一 —

華藏淨宗學會印贈

大方廣佛華嚴經疏論纂要卷第八十一

五臺山清涼國師澄觀疏鈔

太原方山長者李通玄論

閩鼓山私淑比丘道霈纂要

佛不思議法品第三十三之一

○初大意三段

疏初明來意。先通後別。通則此下五品爲答第二會初如來地等十句問故。古德但有二品答前。謂前明修生之因。今辨修生之果。因圓果滿。故次來也。若答前問。何以重請。由因果隔絕。念法希聞。因

德尙深。果必玄妙。故念請耳。別明此品。則前品因終。此品果始。故次來也。鈔若答前問下。解妨先問。以前六會共答前問。皆不重請。故問此品。何以重請。由因果下。古德答此。乃有二意。一因果隔絕。前諸會同因。故不別問。此下是果。果隔於因。故此重問。二念法希奇。果不思議。故復念請。

〔疏〕二釋名者。如來果法。迥超言慮。故以爲名。斯卽佛之不思議法也。

〔疏〕三宗趣者。先總後別。總明說佛果德體用。心言罔及爲宗。令總忘言。絕想速滿。爲趣。別就宗中。三門分別。一通辨佛德。若說百四十。不共佛法。通於權小。若五法攝大覺性。猶通於權。若言唯一味實。

德者約理頓說。若言具無盡德。是此所明。故後文

中初標十問。答具多門。類通十方。一。一無盡。鈔初

佛德。言百四十不共者。已見光明覺品。今重舉總

數。謂三十二相。八十種好。四一切種清淨。十九。四

無所畏。三念住。三不護。大悲無忘失法。永斷習氣。

一切種妙智。為百四十。而通權小者。小乘亦說。但

相劣耳。權大說者。皆悉超勝。此約五教。已有其二。

若五法下。正明實教。故云通權。權實皆有。但實教

中會歸法性。不壞相耳。若言唯一味下。二即頓教。

若言具無盡下。二即圓教。從故後文中下。四辨今

經是圓。二別顯義相。諸佛功德。不出二種。一者修

功德。二者本有。初謂信等。本無今有。後謂真如。具性

功德。此二無礙。應成四句。一唯修生。二唯本有。以

性相區分故。三本有修生。謂如來藏待彼了因。本

隱今顯故。四修生本有。無分別智。冥符理故。若權教所明。二德不雜。法報四句。亦有差殊。依此經宗。雖有四義。而無四事。本有如真金。修生如嚴具。然由嚴具。方顯金德。嚴具無體。全攬金成。故唯金不礙嚴具。唯法身而不礙報化。唯嚴具亦然。既互全收。故十身無礙。八相該於法界。丈六徧於十方。諸根毛孔。各無限量。亦不礙量。量與無量。無有障礙。

鈔二別顯義相於中有二。初正顯二德。言信等者。此通行位。信為萬行之首。則該進念定等。位亦以信為初。五十二位所有行德。皆有二故。若權教下。二棟權異實。初明權故。言不雜者。如轉依果。有二。一。所生得。卽是四智。二。所顯得。卽是涅槃。涅槃本有。四智修生。修生有為。修顯無為。故二不雜。法報

四句者。遮救恐外救云。我宗亦有四句。何異前融。一唯法。卽在纏法身。二唯報。卽四智菩提。三亦法。亦報。謂真如出纏。具諸功德。四非法。非報。所謂應化。今言亦有差殊者。正揀權也。雖有四句。染淨時乘。法報非一。思之。依此經宗下。三顯實教。舉喻四句。喻上四句。今更以喻總喻二德。如修生在因。漸顯於本。有在果。圓滿於本。有非本。有理。有漸。有圓。如初生月。明雖漸滿。而常帶圓月。以圓月常在。故如十五日月。徧在初一。二。三。等中。則知滿果。徧在因位。亦令後後常具前前。前前常具後後。以初一日。有二日月。乃至十五日月。以十五日月。卽初月。故法合可知。由此故云。修生本有。以初圓時。先已圓。故本有修生。以初生。三顯不思議之義。泛明有時。亦已圓。故忘懷思之。

四。一理妙難測。二事廣難知。三行深越世。四果用超情。今文通四。正辨後一。就後一中。復開爲四。一何者。不思議。畧辨十種。一智超世表。二悲越常情。

三無思成事。四同染相淨。五所作秘密。六業用廣大。七多少卽入。八分圓自在。九依正無礙。十理事一味。文竝具之。恐繁不引。二於何不思議。此有四位。一過世間。二越權小。三超因位。四顯法自體。三云何不思議。亦有四種。謂非聞思修。及報智境故。四何用不思議。亦有四種。謂令信向故。起行求故。隨分證故。圓滿得故。前竝是宗。唯何用爲趣。卽此宗趣。可以釋名。四何用下徵不思議意。謂如來說法本欲利生。令絕言思於物何益。

答意云。今信入。故謂欲證入。要須心絕動搖。言亡戲論耳。

論將釋此品約立四門。一釋品名目。二釋品來意。

三釋能說法主。四隨文釋義。一釋品名目者。此品依如來身口智三業得名。云何名不思議。想心不能及。名爲不思。情識名言不能及。故言不議。明如來智用。非識心妄情思慮所知。故情亡想寂。智現乃應。名爲不思議。二釋品來意者。明前品旣說菩薩住處攝生住持之宜。此品卽明能化之智。故名佛不思議。非情識議量所爲。任智自性徧周。不爲應物。故有此品來也。三釋能說法王者。說法菩薩號青蓮華藏。明前品菩薩得法成忍。得心自在。號曰心王。此明根本智圓明。清淨無染。名青蓮華。以



根本智圓明。能成差別智名藏故。告蓮華藏菩薩者。明根本智告差別智故。爲表相成故。此品意明以自心王根本智。說差別智教化衆生自佛事業。大自在用故。爲此會中。從阿僧祇品。至出現品。有八品經。總談佛果位中心行法則故。該前五位差別同所歸故。不移十三昧之體。普光明智。而有此八品法門。及一部經故。皆約自佛智德。立菩薩名。而說自法令。易解故。四隨文釋義者。於此一品經。長科爲三十五段。前三段是問。并佛加持及青蓮華獲益。後三十二段是答。

○次正釋文五品分二初品總明佛德後四別顯佛德古德後二為平等因果此但三品果法有將此三配體相用後二可然初品有妨有相用故今依賢首初品總顯佛德體用次品別顯勝德之相後品別明勝德用益又初品明德次品明相後品明好鈔後之四品者是疏新意欲將五品答其十問然有三重此品總明佛德具答十問如下科釋二者一門中含答十門亦如下釋三者五品廣答十問如下說分之初古德已下敘昔今初分四一請分疏且述古便依三品科經

二加分三證分四說分今初

爾時大會中有諸菩薩作是念諸佛國土云何不思

議諸佛本願云何不思議諸佛種性云何不思議諸佛出現云何不思議諸佛身云何不思議諸佛音聲云何不思議諸佛智慧云何不思議諸佛自在云何不思議諸佛無礙云何不思議諸佛解脫云何不思議

疏文二。先明請人。後諸佛下。正顯所念十法。皆云不思議。卽前果用超情。離於說相故。此十句義並多含。皆通真應。不得一向就應而辨。然此十問。攝前普光後二十句所成果問。謂身攝六根智攝佛境佛地及最勝三問。自在攝五。一神力。二神通。三

十力。四無畏。五三昧。此竝前開此合。鈔然此十下。對前相攝今。

當先列第二會初二十句問。一。如來地。二。如來境界。三。如來神力。四。如來所行。五。如來十力。六。如來

無畏。七。如來三昧。八。如來神通。九。如來自在。十。如來無礙。十一。如來眼。十二。如來耳。十三。如來鼻。十

四。如來舌。十五。如來身。十六。如來意。十七。如來辯才。十八。如來智慧。十九。如來最勝。二十。欠光明。故

唯有十九。然句句皆有云。何是言。經中十句。次第可知。此中攝彼不依次第。對前成三類故。一。前開

此合。二。前合。此開。三。無開合。欲以此少攝彼之多。故先明前開此合。乃有三句。攝前十六句。第二前

合。此開以前二句。攝五句。第三節。彼此一句。則此中初合有三。次。此開有六。後。此不開有一。具足十

句。彼前初開有十六。次。合有二。後。不開合亦一。成十九句。就初前開中。第一。身攝六根者。身即六中

之一。兼攝欠光明一句。故有七句。第二。智慧攝三。兼能攝智為四。第三。自在攝五。兼能攝自在為六。

故成。前境界中。開出國土。所化所依之境。故前所

行中。開出出現。本願種性。種性卽悲智之行。本願  
 就因辨行故。出現是佛普賢行故。出現與行互有  
 寬隘。下出現品。行是其一故。前之無礙。此開解脫  
 作用無礙名解脫故。所以開合者。顯義無方故。名  
 多同者。顯不異故。前境界下。第二前合此開中。亦  
 有三節。而初境界國上。無能攝  
句。境界由前智慧已攝境故。故雖三節。但有二句  
 境界。是所化之境。國土是所依之境。第二節所行  
 攝三。卽有能攝然三。皆行故。言出現與行互有寬  
 狹者。遮難。恐有難言。彼十門出現。行是其一。如何  
 此。行能攝彼耶。故以互有寬狹通之。如以菩提爲  
 門。則菩提之性。攝於涅槃。若以涅槃爲門。則涅槃  
 攝於菩提。前之無礙者。是第三節。音聲卽辯。雖無  
 則前但有一。此則具於無礙解脫。音聲卽辯。雖無  
 開合。各有寬狹。義旨大同。音聲卽辯下。第三無  
 開合。前後各一句。

更爲立圖

○佛不思議法品初十問 ○如來名號品二十問

一國土  
○  
○二如來境界

二本願  
○

三種性  
○  
○四所行

四出現  
○

○十一眼


○十二耳


○十三鼻

○十四舌

五身  
○







疏此十義相第二會中已釋。至下說分重明

○第二加分

爾時世尊。知諸菩薩心之所念。則以神力加持。智慧  
 攝受。光明照耀。威勢充滿。令青蓮華藏菩薩住佛無



畏入佛法界。獲佛威德。神通自在。得佛無礙。廣大觀察。知一切佛種性次第。住不可說佛法方便。

疏加分中三。初加因。神知機故。次則以下。顯加相。三業加故。初句總。餘句別。謂意語身。以光卽教光。故後令青蓮華下。加所爲。爲具說德故。文有八句。一外制無畏。二內證深寂。此意業勝。三威德內充。四神用外徹。此身業勝。五具四無礙。是語業勝。六徧觀機教。爲廣大。七知性無差。爲次第。八授記善巧。爲方便。皆說德也。所以加青蓮華藏者。果德離言。藉因顯故。因果同時。故性德無染。最超勝故。一

德具含一切功德故。

鈔果德離言者。此文有四節。此對表花之義。經宗有因果。

二分。十地已明。花引果故。二因果下。表蓮華義。謂有問言。是花引果。何要蓮華。故答云。餘花花前果。後。此花不有則已。有則花實雙合。又無染故。故舉蓮華。三又問言。蓮華有四。何要舉青。故疏答云。最超勝故。智論云。水生花勝者。即優鉢羅花故。四又蓮華。一蓮多子。表一合一切故。此釋藏義。

○第三證分

爾時青蓮華藏菩薩。則能通達無礙法界。則能安住離障深行。則能成滿普賢大願。則能知見一切佛法。以大悲心觀察衆生。欲令清淨。精勤修習。無有厭怠。受行一切諸菩薩法。於一念中。出生佛智。解了一切無盡智門。總持辯才。皆悉具足。

〔疏〕十句。初四自利。次三利他。上皆自分。後於一念下三句。勝進。並顯可知。

○第四說分。分二。先承力總告。

承佛神力。告蓮華藏菩薩言。

〔疏〕告蓮華藏者。非同佛心。無以受佛德故。亦名蓮華。不言青者。不礙能說爲最勝故。

○後正顯佛德。畧有二義。一總下五品。共答十問。此品答佛種性。佛以功德爲種性故。次二品答身。次一品答本願。後一品答出現。其國土問。初會已廣。餘或經來未盡。或前後攝之。二者此品。

具答十問。謂佛德無量。畧顯三十二門。門門皆具十。有三百二十德。以顯無盡。昔以初十標宗畧答。具答十問。所餘唯有別答。而超次答前十問。今謂三十二門。如次答前十問。而門門皆含答十。欲顯佛德。一具一切。故亦顯所問能包含。故。而其標門之名。多不同前者。爲顯佛德無邊量。故文分爲十。初二門答國土問。第二念念出生。下二門答本願問。第三不思議境。下二門答種性問。第四普入。下二門答出現問。第五離過清淨。下五門答身問。第六演說。下二門答音聲。

問第七最勝下三門。答智慧問第八自在下八門。答自在問第九決定下三門。答無礙問第十一切智住下三門。答解脫問以身及自在。含前普光諸問多故。用門亦多。而文多有二。謂標釋。結義相至文當顯。今初二門答國土。

佛子。諸佛世尊有無量住。所謂常住大悲。住種種身。作諸佛事。住平等意轉淨法輪。住四辯才說無量法。住不思議一切佛法。住清淨音徧無量土。住不可說甚深法界。住現一切最勝神通。住能開示無有障礙究竟之法。

疏國土卽是所依所住。初門明其常住法門。後門明其徧住法界。不唯國土不在方所。爲真土也。今初文二。初標。後釋。釋中九句。顯於如來應機說法。含答十問。則十問皆成住處。下皆倣之。一起應之心。答種性問。悲爲種性故。二演法之身。答身問。三轉法之意。答本願問。本願平等利一切故。四能轉之辯。答音聲問。音出辯故。五所轉之法。答自在。自在不思議故。六轉音徧。答國土。國土是音所至故。七所顯之理。答智慧。智慧能住法界故。八能化之通。答神通問。九演法之益。答無礙問。文唯九句。

脫於出現。或通前諸句。出現皆能作。前九故。答此  
十問。既爾。答初二會。類例可知。鈔今初下釋文。但  
明記上十問。尋文

易了。或開或  
合。顯義無方。

論已下。通十種無量。任總有三十二種無量。普徧  
周無礙。總別同異。成壞自在。因陀羅網門。答前十  
問。問佛不思議法故。於此三十二種。如因陀羅網。  
互叅普徧。周法門中。約數有三百二十種。答前十  
問。此三百二十種。因陀羅網互叅法門中。以明佛  
不思議。無盡無盡。重重無限。無限。如下一  
段中。自具十法。如經自明。不煩科意。

佛子。諸佛世尊有十種法。普徧無量無邊法界。何等爲十。所謂一切諸佛有無邊際身。色相清淨。普入諸趣而無染著。一切諸佛有無邊際無障礙眼。於一切法悉能明見。一切諸佛有無邊際無障礙耳。悉能解了一切音聲。一切諸佛有無邊際鼻。能到諸佛自在彼岸。一切諸佛有廣長舌。出妙音聲。周徧法界。一切諸佛有無邊際身。應衆生心。咸令得見。一切諸佛有無邊際意。住於無礙平等法身。一切諸佛有無邊際無礙解脫。示現無盡大神通力。一切諸佛有無邊際清淨世界。隨衆生樂現衆佛土。具足無量種種莊嚴。



而於其中不生染著。一切諸佛有無邊際菩薩行願。得圓滿智遊戲自在。悉能通達一切佛法。佛子。是爲如來應正等覺普徧法界無邊際十種佛法。

〔疏〕二普徧法界者。明其徧住。謂六根三業皆徧法界。土故標中無量。是事法界。無邊是理。此二無礙。及事事無礙法界。並爲所徧。列中則顯前十皆徧。一無邊身。含答三問。一正答身。其普徧諸趣。是有悲性。及出現義。次六是身別相。亦是於身兼答普光眼等六問。出妙音聲。答音聲問。第八答三問。謂無礙答第九解脫答第十。神通力答自在。第九別

答國土第十答本願及智慧問

初二門答國土問竟

○第二二門答本願問。此門明乘願現其八相。後門明願不失時。今初

佛子。諸佛世尊有十種念念出生智。何等爲十。所謂  
一切諸佛於一念中。悉能示現無量世界。從天來下。  
一切諸佛於一念中。悉能示現無量世界。菩薩受生。  
一切諸佛於一念中。悉能示現無量世界。出家學道。  
一切諸佛於一念中。悉能示現無量世界。菩提樹下。  
成等正覺。一切諸佛於一念中。悉能示現無量世界。

轉妙法輪。一切諸佛於一念中。悉能示現無量世界。教化衆生。供養諸佛。一切諸佛於一念中。悉能示現無量世界。不可言說種種佛身。一切諸佛於一念中。悉能示現無量世界。種種莊嚴無數莊嚴如來自在。一切智藏。一切諸佛於一念中。悉能示現無量世界。無量無數清淨衆生。一切諸佛於一念中。悉能示現無量世界。三世諸佛種種根性。種種精進。種種行解。於三世中成等正覺。是爲十。

疏。然願以後得智爲體。從其願智。生八相等。非生智也。別中一乘願下生。二受生種族。三學解脫道。

四明其出現。五音聲。六化生嚴國。七現身。八自在。  
相嚴福嚴。嚴如來藏故。九是無礙。十卽智慧正徧  
知故。

佛子。諸佛世尊有十種不失時。何等爲十。所謂一切  
諸佛成等正覺不失時。一切諸佛成熟有緣不失時。  
一切諸佛授菩薩記不失時。一切諸佛隨衆生心示  
現神力不失時。一切諸佛隨衆生解示現佛身不失  
時。一切諸佛住於大捨不失時。一切諸佛入諸聚落  
不失時。一切諸佛攝諸淨信不失時。一切諸佛調惡  
衆生不失時。一切諸佛現不思議諸佛神通不失時。

是爲十

疏二不失時者。行止在緣。根熟化現。未熟便捨。非願不周。若機熟失時。便違本願。別中一出現。二成本願有緣。三知種性與記。四自在。五現身。六智住於捨。七六根無礙。八淨國攝信。九強音調惡。十卽不思議解脫。第二二門答本願問竟。

○第三二門答種性問。此門雙明報應種性皆眞正故。後門唯明法身種性。今初。

佛子。諸佛世尊有十種無比不思議境界。何等爲下。所謂一切諸佛一加趺坐徧滿十方無量世界。一切

諸佛說一義句。悉能開示一切佛法。一切諸佛放一  
光明。悉能徧照一切世界。一切諸佛於一身中。悉能  
示現一切諸身。一切諸佛於一處中。悉能示現一切  
世界。一切諸佛於一智中。悉能決了一切諸法。無所  
罣礙。一切諸佛於一念中。悉能徧往十方世界。一切  
諸佛於一念中。悉現如來無量威德。一切諸佛於一  
念中。普緣三世佛及衆生心。無雜亂。一切諸佛於一  
念中。與去來今一切諸佛體同無二。是爲十

疏體相超言念。故云不思議。下位不及。故云無比。  
別中。一身。二音。三乘願放光。如其本願所得光故。

四出現。五國土。六智慧。七自在。八威德種族。九無雜之礙。十解脫體同。上之五段。皆畧指陳。兼答十問。已下恐繁不顯。說者隨宜。

佛子。諸佛世尊能出生十種智。何者爲十。所謂一切諸佛知一切法無所趣向。而能出生迴向願智。一切諸佛知一切法皆無有身。而能出生清淨身智。一切諸佛知一切法本來無二。而能出生能覺悟智。一切諸佛知一切法無我無衆生。而能出生調衆生智。一切諸佛知一切法本來無相。而能出生了諸相智。一切諸佛知一切世界無有成壞。而能出生了成壞智。

一切諸佛知一切法無有造作。而能出生知業果智。  
一切諸佛知一切法無有言說。而能出生了言說智。  
一切諸佛知一切法無有染淨。而能出生知染淨智。  
一切諸佛知一切法無有生滅。而能出生了生滅智。  
是爲十

疏二一出生智者明法身爲種性也。從無性中出其  
智慧。非答智慧故。別中十各二句。皆上句知性。卽  
無性之性爲能生。後句出生智用。

第三二門答種性問竟

（第四答出現問



佛子諸佛世尊有十種普入法。何等爲十。所謂一切諸佛有淨妙身。普入三世。一切諸佛皆悉具足三種自在普化衆生。一切諸佛皆悉具足諸陀羅尼。普能受持一切佛法。一切諸佛皆悉具足四種辯才。普轉一切清淨法輪。一切諸佛皆悉具足平等大悲。恒不捨離一切衆生。一切諸佛皆悉具足甚深禪定。恒普觀察一切衆生。一切諸佛皆悉具足利他善根。調伏衆生無有休息。一切諸佛皆悉具足無所礙心。普能安住一切法界。一切諸佛皆悉具足無礙神力。一念普現三世諸佛。一切諸佛皆悉具足無礙智慧。一念

普立三世劫數是爲十

疏此門明徧現常現。非有出沒方爲真現。故別中云。普現三世諸佛。况自身耶。又一現卽一切現。以三世佛無二體故。如文殊般若中辨別中云。三種自在者。卽三業化也。

佛子。諸佛世尊有十種難信受廣大法。何等爲十。所謂一切諸佛悉能摧滅。一切諸魔。一切諸佛悉能降伏。一切外道。一切諸佛悉能調伏。一切衆生咸令歡悅。一切諸佛悉能往詣。一切世界化導羣品。一切諸佛悉能智證甚深法界。一切諸佛悉皆能以無二之

身現種種身充滿世界。一切諸佛悉皆能以清淨音聲起四辯才說法無斷。凡有信受功不唐捐。一切諸佛皆悉能於一毛孔中出現諸佛。與一切世界微塵數等。無有斷絕。一切諸佛皆悉能於一微塵中示現衆刹。與一切世界微塵數等。具足種種上妙莊嚴。恒於其中轉妙法輪教化衆生。而微塵不大。世界不小。常以證智安住法界。一切諸佛皆悉了達清淨法界。以智光明破世癡闇。令於佛法悉得開曉。隨逐如來住十力中。是爲十。

〔疏〕第二十種廣大法者。明出現之相。謂大用無涯。

故云廣大。凡小莫測。故難信受。文顯可知。

第四二門答出現問竟

○第五五門答身問

佛子。諸佛世尊有十種大功德。離過清淨。何等爲十。所謂一切諸佛具大威德。離過清淨。一切諸佛悉於三世如來家生。種族調善。離過清淨。一切諸佛盡未來際。心無所住。離過清淨。一切諸佛於三世法皆無所著。離過清淨。一切諸佛知種種性。皆是一性。無所從來。離過清淨。一切諸佛前際後際福德。無盡等於法界。離過清淨。一切諸佛無邊身相。徧十方刹。隨時

調伏一切衆生離過清淨。一切諸佛獲四無畏離諸恐怖於衆會中大師子吼。明了分別一切諸法離過清淨。一切諸佛於不可說不可說劫入般涅槃。衆生聞名獲無量福。如佛現在功德無異。離過清淨。一切諸佛遠在不可說不可說世界中。若有衆生一心正念。則皆得見。離過清淨。是爲十

疏卽分爲五。一。此門總顯無過。如來三業。隨智慧行故。三業等事。不出於身故。別中十句。多同出現。

品身之十相思之。

鈔別中十句者。彼之十相卽是十身。

佛子。諸佛世尊有十種究竟清淨。何等爲十。所謂一

切諸佛往昔大願究竟清淨。一切諸佛所持梵行究竟清淨。一切諸佛離世衆惑究竟清淨。一切諸佛莊嚴國土究竟清淨。一切諸佛所有眷屬究竟清淨。一切諸佛所有種族究竟清淨。一切諸佛色身相好究竟清淨。一切諸佛法身無染究竟清淨。一切諸佛一切智智無有障礙究竟清淨。一切諸佛解脫自在所作已辦到於彼岸究竟清淨。是爲十

〔疏〕二究竟清淨。明過不生。揀異因淨。故云究竟。惑障諸垢。永不起故。別中前四功德身淨。次三色身。次一法身。次一智身。後一意生等身淨也。（鈔）後一意生者。

由言解脫自在。故云意生身。言等身者。等取願身化身等也。

佛子。諸佛世尊於一切世界一切時有十種佛事。何等爲十。一者若有衆生專心憶念則現其前。二者若有衆生心不調順則爲說法。三者若有衆生能生淨信。必令獲得無量善根。四者若有衆生能入法位。悉皆現證無不了知。五者教化衆生無有疲厭。六者遊諸佛刹往來無礙。七者大悲不捨一切衆生。八者現變化身恒不斷絕。九者神通自在未嘗休息。十者安住法界能徧觀察。是爲十。

〔疏〕三十種作佛事。卽明身之業用。別中亦多同出。

現品身相

佛子。諸佛世尊有十種無盡智海法。何等爲十。所謂  
一切諸佛無邊法身無盡智海法。一切諸佛無量佛  
事無盡智海法。一切諸佛佛眼境界無盡智海法。一  
切諸佛無量無數難思善根無盡智海法。一切諸佛  
普雨一切甘露妙法無盡智海法。一切諸佛讚佛功  
德無盡智海法。一切諸佛往昔所修種種願行無盡  
智海法。一切諸佛盡未來際恒作佛事無盡智海法。  
一切諸佛了知一切衆生心行無盡智海法。一切諸  
佛福智莊嚴無能過者無盡智海法。是爲十。



〔疏〕四無盡智海法者。卽如來六根三業。皆智慧深廣相應故。亦別廣智身。可知。

佛子。諸佛世尊有十種常法。何等爲十。所謂一切諸佛常行一切諸波羅蜜。一切諸佛於一切法常離迷惑。一切諸佛常具大悲。一切諸佛常有十力。一切諸佛常轉法輪。一切諸佛常爲衆生示成正覺。一切諸佛常樂調伏一切衆生。一切諸佛心常正念不二之法。一切諸佛化衆生已常示入於無餘涅槃。諸佛境界無邊際故。是爲十。

〔疏〕五十種常法者。明身中意業恒常用無斷故。

第五五門答身問竟

○第六二門答音聲問

佛子。諸佛世尊有十種演說無量諸佛法門。何等爲十。所謂一切諸佛演說無量衆生界門。一切諸佛演說無量衆生行門。一切諸佛演說無量衆生業果門。一切諸佛演說無量化衆生門。一切諸佛演說無量淨衆生門。一切諸佛演說無量菩薩行門。一切諸佛演說無量菩薩願門。一切諸佛演說無量一切世界成壞劫門。一切諸佛演說無量菩薩深心淨佛刹門。一切諸佛演說無量一切世界三世諸佛於彼彼劫

次第出現門。一切諸佛演說。一切諸佛智門。是爲十。  
佛子。諸佛世尊有十種爲衆生作佛事。何等爲十。所  
謂一切諸佛示現色身爲衆生作佛事。一切諸佛出  
妙音聲爲衆生作佛事。一切諸佛有所受爲衆生作  
佛事。一切諸佛無所受爲衆生作佛事。一切諸佛以  
地水火風爲衆生作佛事。一切諸佛神力自在。示現  
一切所緣境界爲衆生作佛事。一切諸佛種種名號  
爲衆生作佛事。一切諸佛以佛刹境界爲衆生作佛  
事。一切諸佛嚴淨佛刹爲衆生作佛事。一切諸佛寂  
寞無言爲衆生作佛事。是爲十。

疏此門明以音聲辯說兼答普光辯問。後門十種作佛事。明種種說法。謂六塵四大舉動施爲。皆能顯法成益。無非佛事。非獨音聲。如淨名說。別中初身。二音。三四皆智。受爲成彼檀故。不受令彼做佛。行少欲故。又以無所受受諸受故。餘可知。

第六二門答音聲問竟

○第七三門答智慧問

佛子。諸佛世尊有十種最勝法。何等爲十。所謂一切諸佛大願堅固不可沮壞。所言必作言無有二。二切諸佛爲欲圓滿一切功德。盡未來劫修菩薩行不生。

懈倦。一切諸佛爲欲調伏一切衆生故。往不可說不可說世界。如是而爲一切衆生而無斷絕。一切諸佛於信於毀。二種衆生。大悲普觀平等無異。一切諸佛從初發心乃至成佛。終不退失菩提之心。一切諸佛積集無量諸善功德。皆以迴向一切智性。於諸世間終無染著。一切諸佛於諸佛所修學三業。唯行佛行。非二乘行。皆爲迴向一切智性。成於無上正等菩提。一切諸佛放大光明。其光平等照一切處。及照一切諸佛之法。令諸菩薩心得清淨。滿一切智。一切諸佛捨離世樂。不貪不染。而普願世間離苦得樂。無諸戲

論一切諸佛愍諸衆生受種種苦。守護佛種。行佛境界。出離生死。逮十力地。是爲十

疏初此一門總明權實因果之智。兼答普光最勝之問。智慧最勝。故結云。任十力地。兼答佛地之問。

別中四。卽三念處行。餘可思之。鈔四卽三念者。亦云三念住。念謂能

緣之慧。處謂不增不減平等之理。初一心聽法不憂。二一心聽法不喜。三常行捨心。以法界中滅退相。不可得。故增進相。不可得。故卽涅槃相。故如次配之。

佛子。諸佛世尊。有十種無障礙住。何等爲十。所謂一切諸佛。皆能往一切世界。無障礙住。一切諸佛。皆能住一切世界。無障礙住。一切諸佛。皆能於一切世界

行住坐臥無障礙住。一切諸佛皆能於一切世界演  
說正法無障礙住。一切諸佛皆能於一切世界住兜  
率大宮無障礙住。一切諸佛皆能入法界一切三世  
無障礙住。一切諸佛皆能坐法界一切道場無障礙  
住。一切諸佛皆能念念觀一切衆生心行。以三種自  
在教化調伏無障礙住。一切諸佛皆能以一身住無  
量不思議佛所及一切處利益衆生無障礙住。一切  
諸佛皆能開示無量諸佛所說正法無障礙住。是爲  
十

〔疏〕二無障礙住。明智慧離障。以智慧所作無礙故。

一切無礙

佛子。諸佛世尊有十種最勝無上莊嚴。何等爲十。所謂一切諸佛皆悉具足諸相隨好。是爲諸佛第一最勝無上身莊嚴。一切諸佛皆悉具足六十種音。一一音有五百分。一分無量百千清淨之音。以爲嚴好。能於法界一切衆中無諸恐怖。大師子吼演說如來甚深法義。衆生聞者靡不歡喜。隨其根欲悉得調伏。是爲諸佛第二最勝無上語莊嚴。一切諸佛皆具十力。諸大三昧十八不共莊嚴。意業所行境界。通達無礙。一切佛法咸得無餘。法界莊嚴而爲莊嚴。法界衆



生心之所行去來現在各各差別於一念中悉能明見。是爲諸佛第三最勝無上意莊嚴。一切諸佛皆悉能放無數光明。一一光明有不可說光明網以爲眷屬。普照一切諸佛國土。滅除一切世間黑闇。示現無量諸佛出興。其身平等悉皆清淨。所作佛事咸不唐捐。能令衆生至不退轉。是爲諸佛第四最勝無上光明莊嚴。一切諸佛現微笑時。皆於口中放百千億那由他阿僧祇光明。一一光明各有無量不思議種種色。徧照十方一切世界。於大衆中發誠實語。授無量無數不思議衆生阿耨多羅三藐三菩提記。是爲諸

佛第五離世癡惑最勝無上現微笑莊嚴。一切諸佛皆有法身清淨無礙。於一切法究竟通達。住於法界無有邊際。雖在世間不與世雜。了世實性。行出世法。言語道斷。超蘊界處。是爲諸佛第六最勝無上法身莊嚴。一切諸佛皆有無量常妙光明。不可說不可說。種種色相以爲嚴好。爲光明藏。出生無量圓滿光明。普照十方。無有障礙。是爲諸佛第七最勝無上常妙光明莊嚴。一切諸佛皆有無邊妙色。可愛妙色。清淨妙色。隨心所現妙色。映蔽一切三界妙色。到於彼岸無上妙色。是爲諸佛第八最勝無上妙色莊嚴。一切

諸佛皆於三世佛種中生。積衆善寶。究竟清淨。無諸過失。離世譏謗。一切法中最爲殊勝。清淨妙行之所莊嚴。具足成就一切智智。種族清淨。無能譏毀。是爲諸佛第九最勝無上種族莊嚴。一切諸佛以大慈力莊嚴其身。究竟清淨。無諸渴愛。身行永息。心善解脫。見者無厭。大悲救護。一切世間第一福田。無上受者。哀愍利益一切衆生。悉令增長。無量福德智慧之聚。是爲諸佛第十最勝無上大慈大悲功德莊嚴。是爲十

疏三十種無上莊嚴卽智慧成益。由內具智嚴故。

外具諸嚴標中。超下位。故最勝。上無加。故云無上。別中十義。結名自顯。一相好身。二圓滿音。三以功德嚴意。四放光。五微笑授記。其緣甚衆。離世間品亦明。六法身中真如出纏。故云清淨無礙。卽法性法身。本智反照。故於一切法究竟通達。卽智慧法身。智契法界。俱無邊際。雖在已下。應化法身。了世已下。功德法身。嚴理智故。了世實性。成上不雜。生下出世。行出世法。則功德備矣。言語道斷。卽虛空法身。亦實相法身。體絕百非。言亡四句。唯證相應。故超蘊界處。顯是無爲。翻有漏蘊。成五分法身。若

翻界處。則外六塵亦國土身。則十身圓融。成真法身矣。七卽常光。八金等妙色。九中具真應種。三世佛種。卽真如無性故。應種可知。十中起必智俱。故無渴愛。動與道合。故身行永息。心善解脫。成上無愛。見者無厭。成上行息。此皆功德。亦無愛見。成下大悲。旣爲第一田。故受施之中。更無過上。

第七三門答智慧問竟

○第八八門答自在問。卽爲八段

佛子。諸佛世尊有十種自在法。何等爲十。所謂一切諸佛於一切法悉得自在。明達種種句身味身。演說

諸法辯才無礙。是爲諸佛第一自在法。一切諸佛教化衆生。未曾失時。隨其願樂。爲說正法。咸令調伏。無有斷絕。是爲諸佛第二自在法。一切諸佛能令盡虛空界無量無數種種莊嚴。一切世界六種震動。令彼世界或舉或下。或大或小。或合或散。未曾惱害於一衆生。其中衆生不覺不知。無疑無怪。是爲諸佛第三自在法。一切諸佛以神通力。悉能嚴淨一切世界。於一念頃。普現一切世界莊嚴。此諸莊嚴。經無數劫。說不能盡。悉皆離染清淨無比。一切佛刹嚴淨之事。皆令平等入一刹中。是爲諸佛第四自在法。一切諸佛

見一衆生應受化者。爲其住壽經不可說不可說劫。乃至盡未來際。結跏趺坐。身心無倦。專心憶念。未曾廢忘。方便調伏而不失時。如爲一衆生。爲一切衆生。悉亦如是。是爲諸佛第五自在法。一切諸佛悉能徧往一切世界。一切如來所行之處而不暫捨。一切法界十方各別。一一方有無量世界海。一一世界海有無量世界種。佛以神力一念咸到。轉於無礙清淨法輪。是爲諸佛第六自在法。一切諸佛爲欲調伏一切衆生。念念中成阿耨多羅三藐三菩提。而於一切佛法非已現覺。亦非當覺。亦不住於有學之地。而悉知

見通達無礙。無量智慧。無量自在。教化調伏一切衆生。是爲諸佛第七自在法。一切諸佛能以眼處作耳處佛事。能以耳處作鼻處佛事。能以鼻處作舌處佛事。能以舌處作身處佛事。能以身處作意處佛事。能以意處於一切世界中住。世出世間種種境界。一一境界中能作無量廣大佛事。是爲諸佛第八自在法。一切諸佛其身毛孔。一一能容一切衆生。一一衆生。其身悉與不可說諸佛刹等。而無迫隘。一一衆生。步步能過無數世界。如是展轉盡無數劫。悉見諸佛。出現於世。教化衆生。轉淨法輪。開示過去未來現在不



可說法。盡虛空界一切衆生。諸趣受身。威儀往來。及其所受種種樂具。皆悉具足。而於其中無所障礙。是爲諸佛第九自在法。一切諸佛於一念頃。現一切世界微塵數佛。一一佛皆於一切法界衆妙蓮華廣大莊嚴世界。蓮華藏師子座上。成等正覺。示現諸佛自在神力。如於衆妙蓮華廣大莊嚴世界。如是於一切法界中。不可說不可說種種莊嚴種種境界種種形相。種種示現種種劫數清淨世界。如於一念。如是於無量無邊阿僧祇劫一切念中。一念一切現。一念無量住。而未曾用少方便力。是爲諸佛第十自在法。

疏初一總明自在兼攝加持。初總可知。別中全同八地之中十種自在。但深廣不次耳。一法自在。論經云。無中邊法門。示現故。二心自在。無量阿僧祇劫。三昧入智故。由在三昧觀機故。化不失時。三勝解自在。大小淨穢。隨解轉變故。四財自在。一切世界無量莊嚴嚴飾。任持故。五命自在。不可說劫。命任持故。六如意自在。一切國土中如意變化故。七智自在。如來力無畏。不共法相好莊嚴。三善提示現故。文中生界無邊。機熟相續。故念念應成。而眞成在昔故。佛於三世。非是新覺。亦非不覺。住在學

地又顯雖念念覺離覺相故。非三世覺亦離不覺。故不住學地。又云。而悉通達無量智等。卽十力等。八業自在。六根互用。廣大佛事。是佛業故。然非改轉。一根不變。本來具故。九生自在。一切世界生示現故。十願自在。隨心所欲。佛國土時示成三菩提故。上來唯三與八取意而釋。餘竝論經之文。其第十自在。文有四節。一。一念現多佛於一類界成佛。二。如於衆妙下。類顯餘界。三。如於一念下。類顯餘念。四。一念一切現下。總結深廣。一切現者。一念便現法界。諸形諸時。諸神力故。一念無量住者。常無

現故而不動如來少許方便故云自在

佛子。諸佛世尊有十種無量不思議圓滿佛法。何等  
爲十。所謂一切諸佛一一淨相皆具百福。一切諸佛  
皆悉成就一切佛法。一切諸佛皆悉成就一切善根。  
一切諸佛皆悉成就一切功德。一切諸佛皆能教化  
一切衆生。一切諸佛皆悉能爲衆生作主。一切諸佛  
皆悉成就清淨佛刹。一切諸佛皆悉成就一切智智。  
一切諸佛皆悉成就色身相好。見者獲益功不唐捐。  
一切諸佛皆具諸佛平等正法。一切諸佛作佛事已。  
莫不示現入於涅槃。是爲十

疏第二不思議圓滿佛法者。明圓滿自在。謂前十自在。八地容有。故顯如來十種圓滿。又無一法不自在。故方云圓滿。別中二卽證成菩提十力等。云一切佛法。九卽具有法輪教法。三通福智。故曰善根。四唯是福。但云功德。餘可思準。

佛子。諸佛世尊有十種善巧方便。何等爲十。一切諸佛了知諸法。皆離戲論。而能開示諸佛善根。是爲第一善巧方便。一切諸佛知一切法。悉無所見。各不相知。無縛無解。無受無集。無成就自在。究竟到於彼岸。然於諸法。真實而知不異。不別而得自在。無我無受。

不壞實際。已得至於大自在。地常能觀察一切法界。是爲第二善巧方便。一切諸佛永離諸相。心無所住。而能悉知不亂不錯。雖知一切相皆無自性。而如其體性。悉能善入。而亦示現無量色身。及以一切清淨佛土種種莊嚴無盡之相。集智慧燈滅衆生惑。是爲第三善巧方便。一切諸佛住於法界。不住過去未來現在。如如性中。無去來今三世相。故能演說去來今世無量諸佛出現世間。令其聞者普見一切諸佛境界。是爲第四善巧方便。一切諸佛身語意業無所造作。無來無去。亦無有住。離諸數法。到於一切諸法。

彼岸而爲衆法藏具無量智。了達種種世出世法。智  
慧無礙。示現無量自在神力。調伏一切法界衆生。是  
爲第五善巧方便。一切諸佛知一切法不可見。非一  
非異。非量非無量。非來非去。皆無自性。亦不違於世  
間諸法。一切智者無自性中見一切法。於法自在廣  
說諸法。而常安住真如實性。是爲第六善巧方便。一  
切諸佛於一時中知一切時。具淨善根入於正位而  
無所著。於其日月年劫成壞如是等時不住不捨。而  
能示現若晝若夜。初中後時。一日七日。半月一月。一  
年百年。一劫多劫。不可思劫。不可說劫。乃至盡於未

來際劫恒爲衆生轉妙法輪。不斷不退。無有休息。是爲第七善巧方便。一切諸佛恒住法界。成就諸佛無量無畏。及不可數辯。不可量辯。無盡辯。無斷辯。無邊辯。不共辯。無窮辯。真實辯。方便開示一切句辯。一切法辯。隨其根性及以欲解。以種種法門說不可說。不可說百千億那由他脩多羅。初中後善皆悉究竟。是爲第八善巧方便。一切諸佛住淨法界。知一切法本無名字。無過去名。無現在名。無未來名。無衆生名。無非衆生名。無國土名。無非國土名。無法名。無非法名。無功德名。無非功德名。無菩薩名。無佛名。無數名。無



非數名。無生名。無滅名。無有名。無無名。無一名。無種  
種名。何以故。諸法體性不可說故。一切諸法無方無  
處。不可集說。不可散說。不可一說。不可多說。音聲莫  
逮。言語悉斷。雖隨世俗種種言說。無所攀緣。無所造  
作。遠離一切虛妄想著。如是究竟到於彼岸。是爲第  
九善巧方便。一切諸佛知一切法本性寂靜。無生故  
非色。無戲論故非受。無名數故非想。無造作故非行。  
無執取故非識。無入處故非處。無所得故非界。然亦  
不壞一切諸法本性無起。如虛空故。一切諸法皆悉  
空寂。無業果。無修習。無成就。無出生。非數非不數。非

有非無。非生非滅。非垢非淨。非入非出。非住非不住。  
非調伏。非不調伏。非衆生。非無衆生。非壽命。非無壽  
命。非因緣。非無因緣。而能了知正定。邪定。及不定。聚  
一切衆生。爲說妙法。令到彼岸。成就十力。四無所畏。  
能師子吼。具一切智。住佛境界。是爲第十善巧方便。  
佛子。是爲諸佛成就十種善巧方便。

〔疏〕第三善巧方便。卽於法自在。皆權實等無礙故。  
別中。一知實離言。絕動搖之戲論。而起權開示善  
根。故爲自在。二證實無能所見。而不礙於法真實  
知見。無縛無解。而至大自在。三無相知相。無性入

性亦能示現依正調生。四證冥三際之理。而演三際益生。五三業湛然而包含示現。六知非一異而見一切法。七知時融入。故不住不捨。而不壞年劫。演法無休。八恒住法界。則寂無所住。而成就無量無畏。十辯演法。十辯者。一多故。二非心測故。三隨說一事窮劫不盡故。四任放辯才無有問故。五觸類成辯故。六下位所無故。七無能難屈故。八皆契事理故。九無一句義不能顯故。十無有一法不能演故。初中後善下。明說之德。具七善故。或開爲十。瑜伽八十五云。一初善。聽聞時生歡喜故。二中善。

修行時無有艱苦。遠離二邊。依中道行。故三後善。謂究竟離垢等故。今文云。皆悉究竟。諸經論中。更有多釋。恐厭繁文。餘七經文畧無九離說而說。故無想著。十了寂起用。於中先知本寂。後而能下。不廢起用。前中亦二。先正顯。後然亦下釋成。謂色等性無非遣之使無。故不壞諸法。卽空無業等。後起用。可知。

大方廣佛華嚴經疏論纂要卷第八十一

福城比丘尼傳超捐貲刻此  
 華嚴經佛不思議法品疏論纂要第八  
 十一卷伏願離五漏之體轉七寶之身  
 生生不染塵緣在在常弘正法廣接有  
 緣同歸華藏均資三有上報四恩  
 康熙庚申四月佛誕日 華藏室謹題